

27. april 2005

UPA 2005/15

**Naalackersuinikkut sulinermut
aningaasatigut tapiissuteqartarneq pillugu
Inatsisartut inatsisaata allangortinneqarnissaanut
Inatsisartut aalajangiiffigisassaattut siunnersuut**

pillugu

Inatsisartut Inatsisit Atortinneqarnerannut Ataatsimiititaliaata

ISUMALIUTISSIISSUTAA

siunnersuutip aappassaaneerneqarnerani saqqummiunneqartoq

Inatsisartut Inatsisit Atortinneqarnerannut Ataatsimiititaliaat sularinninnermini ukuninnga inuttaqarpoq:

Inatsisartunut ilaasortaq Ane Hansen, Inuit Ataqaatigiit, siulittaasoq
Inatsisartunut ilaasortaq Ole Dorph, Siumut
Inatsisartunut ilaasortaq Enos Lyberth, Siumut
Inatsisartunut ilaasortaq Ellen Christoffersen, Atassut
Inatsisartunut ilaasortaq Marie Fleischer, Demokraatit

Inatsisartut Inatsisit Atortinneqarnerannut Ataatsimiititaliaata UPA 2005-mi siullermeerinerup kingorna siunnersuut oqaaseqaatitai ilanngullugit misissuataarpaa.

Tunuliaqutaq.

Siullermeerinerup nalaani siunnersuut naalackersuinikkut partiinit amerlasuunit tapersorneqarpoq. Siunnersuulli Inatsisit Atortinneqarnerannut Ataatsimiititaliamut innersuunneqarpoq, pingaartumik eqquutsitsiniarnermi periarfissat inatsimmiittut naammaginatutut isigineqarsinnaanersut misissortikkumallugu. Matuma saniatigut nalunaarut naatsorsuutillu

kukkunersiukkat tunniunniissaannut piffissaritinneqartoq pillugu oqaaseqaateqartoqarpoq.

Tulliuttut apeqqutit taaneqartut qineqqusaarnermut tapiissutinut tunngasut taamaallaat Inatsisit Atortinneqarnerannut Ataatsimiititaliamit nalilersuiffigineqassapput (inatsisip § 6-ia), tassa inatsimmik allannguiq inatsisartuni sulinermut ukiumoortumik tapiissuteqartarnermut tunngassuteqanngimmat (inatsisip §§-iini 2-mit 4-mut).

Inatsisip eqquutsinneqarnissaanut periarfissat pillugit.

Qineqqusaarnermut tapiissutinik tigusaqareernerup kingorna nalunaarutip naatsorsuutillu kukkunersiukkat nassiunneqarnissaannut piffissaliussatut pisussaaffimmut atatillugu eqquutsiniarnermi periarfissat pioreersut tulliuttut Inatsisit Atortinneqarnerannut Ataatsimiititaliap tikkuassallugit kissaatigaa:

1) Nalunaarut naatsorsuutillu kukkunersiukkat nassiunneqarsimatinnagit tapiissutitut tunniunneqarsimasut tamakkiisumik ilaannakortumilluunniit uterteqqinneqarnissaat pillugu Naalackersuisut aalajangiinissamut periarfissaat, inatsisip § 9-ani, imm. 3-ata naggaserneqarnini ilanngullugu periarfissippaa. Taama qisuariarnerup partiit sakkortuumik eqqorsinnaavai paa-sinartuuvorli aammalu tapiissutit sumulluunniit atugassanngorlugit tiguisumut tunniunneqarneq ajormata, tunaartarineqartumullu inatsimmit aalajangerneqartumut atorneqartussaallutik.

2) Tamatuma saniatigut, piffissaliussaasumik qaanngiilaarnerit minnerpaagalulluunniit, partiip uppernassusaanik aningaasaqarnikkut inatsisitigullu apeqqutitut tunngasutigut mianerisaqartariaqarlerneranik innuttaasut akornanni pitsaanngitsumik oqallisiginnilernerimik nassataqaratarsinnaasoq naalackersuinikkut partiit il.il. naatsorsuutigisariaqarpaat. Tamanna qularnanngitsumik pinaveersaartitsinerimik sunniuteqarumaarpoq.

Pissutsinut taakkartorneqartunut piffissaliussamillu qaanngiinerusinnaasunut innuttaasut qisuariaatigisinnaasaat tunniussinissamut piffissaliussap eqquutsinneqarnissaanut naammaginaratumik qulakkeerinnittuusinnaasut Inatsisit Atortinneqarnerannut Ataatsimiititaliami amerlanerussuteqartut Siumumit, Inuit Ataqtiginnit Demokraatiniillu sinniisuutitaasut isumaqarput. Taamaattoqarsimatillugu utertitsinissamik piunasaqaateqartoqarsinnaasariaqartoq Naalackersuisut saqqummiussissutiminni erseqqissarpaat. Taamaalilluni uppernarsaasikkamik siunnerfigineqartoq malillugu qineqqusaarnermut tapiissutit tunniunneqartut atorneqartarnissaat, Naalackersuisut aamma ajunngitsumik qulakkeersinnaagaat ataatsimiititaliami amerla-nerussuteqartut isumaqarput.

Matuma saniatigut piffissaliunneqartumik qaanngiisoqartillugu pinerluuteqarsimasutut pine-qaatissinneqarsinnaanermut toqqammavissiisoqarnissaa aamma mattunneqarsinnaanngilaq. Akiliisitsisinnaaneq uterteqqusinissamik piunasaqaateqarsinnaanermik siusinersukkulli piunasaqaataasumut sanilliukkaanni, partiit inatsimmik eqqortitseqqissaarnissaannut aalajangiisuusumik

malinninnissaannut piumasuseqalersitsinaviarunannqilaq. Taamaattumik piffissaliussanik qaangniinernit, pisut ilaanni paatsoornermik il.il. imaluunniit tunniussivissatut ulloritinneqartup eqqummaariffiginninneqannginnerinnaanit pisinnaasarmata pinerluuteqarnertut isigineqartalernissaat pisariaqanngitsoq amerlanerussuteqartut isumaqarput.

Nalunaarut naatsorsuutillu kukkunersiukkat tunniunneqarfissaannik piffissamik qaangniisut ersarissumik akerlilerneqarsinnaanngitsumillu inatsisitigoortumik kinguneqaatissinneqarsinnaasariaqartut Inatsisit Atortinneqarnerannut Ataatsimiititaliami ikinnerussuteqartoq Atassutip sinniisuutitaa isumaqarpoq. Qisuariaataasartut ilusaat pioreersut unioqquitsinernut naammaginartumik qisuariarnissamut qulakkeerissutaanngitsut ikinnerussuteqartoq isumaqarpoq, tassa Naalakkersuisut eqqoriaanerinnakkut tapiissutit tamakkiisumik ilaannakortumilluunniit utertinneqarnissaannut piunasaqarsinnaanertik annertuumik inatsisinik unioqquitsi-sunut taamaallaat kingullertut atorsinnaammassuk.

Partiit naatsorsuutaasa piffissaq tunniunneqarfissaat pillugu.

Nalunaarut naatsorsuutillu kukkunersiukkat tunniunnissaannut Nalakkersuisut ukiumik ataatsimik piffissaliinissamik siunnersuutigisaannut, maannamut qaammatinik pingasunik piffissaliinermut sanilliullugu sivilisnerusutut isigineqarsinnaasumut ataatsimiititaliami amerlanerussuteqartut Siumumeersut, Inuit Ataqtigiiinneersut Demokraatineersullu isumaqataapput. Piffissaliunneqartulli sivilisussusaa allaffissornikkut inuiaqtigiiinniluunniit allatigut pitsaanngequtinut attuumassuteqanngitsutut oqaatigineqarsinnaavoq. Tassunga atatillugu eqqaasitsissutigineqassaaq, tapiissutit tunniunneqareernikummata piffissaliunneqartoq taamaallaat siunertarisamut atorneqarsimanerinek nakkutilliinerinnaammat aammalu Namminersornerullutik Oqartussat naapertuutsitsinnginnerit patsisaallugit nalinginnaasumik tapiissutit utertinneqarnissaannik piunasaqarnissartik naatsorsuutigikkajunngikkaat. Sanilliussissutit ilan-ngunneqarsinnaavoq akileraaruseriffiup nakkutilliinermik iliuuserisartakkanik, ukioq akileraarusiiffiisoq ukiumik ataatsimik ilami ukiunik arlallinnik qaangniutereeraluaraangataluunniit ingerlassinnaasarmat, tamanna nalinginnaasumik akuerisaavoq. Taamaattumik Naalakkersuisut piffissaliussaasussatut siunnersuutaannut nangaassuteqarnissamut amerlanerussuteqartut patsisissaqanngillat.

Nalunaarut naatsorsuutillu kukkunersiukkat qinersinermiit amerlanerpaamik qaammatit arfinillit qaangniunnerini tunniunneqartariaqartut Inatsisit Atortinneqarnerannut Ataatsimiititaliami ikinnerussuteqartoq Atassutip sinniisuutitaa isumaqarpoq. Tapiissutit unioqquitsinertaqanngitsumik atorneqarsimanerinit uppersaammik pisariaqartumik saqqummiussinissamut partiit il.il. piffissaliinerup taama ittup tamakkiisumik periarfississavai.

Inassuteqaat.

Matuma kingorna inatsisissatut siunnersuutip ilusimisut iluseqartup aappassaaneerinninnermi akuersissutigineqarnissaa ataatsimiititaliami amerlanerussuteqartut Siumumit, Inuit Ataqatigiinnit Demokraatineersullu sinniisuutitaasa inassutigaat.

Inatsisissatut siunnersuutip akuersissutigineqarnissaa sioqqullugu ikinnerussuteqartut inassuteqaataannut naapertuuttumik Naalakkersuisut allannguutissatut siunnersuummik saqqummiussissasut Inatsisit Atortinneqarnerannut Ataatsimiititaliami ikinnerussuteqartup Atassutip sinniisuutitaata inassutigaa.

Taama oqaaseqarluni Inatsisartut Inatsisit Atortinneqarnerannut Ataatsimiititaliaata inatsisissatut siunnersuut Inatsisartunut aappassaaniigassanngortippaa.

Ane Hansen, Siulittaasoq

Ole Dorph

Ellen Christoffersen

Enos Lyberth

Marie Fleischer